

我無朋友

早起頭，珍珍伊婆由眠床爬起呵，伊行啊行，行邁門口，看見隔壁厝阿珠的孫，出門共同學駁遛。

珍珍心咧想：「野好啊，伊有朋友有耐伴，儻像我，都無朋友。」

珍珍行啊行，行邁公園，野睺無見著面的小惠共伊攞手拍招呼，小惠手掏蜀其袋袋講：「珍珍啊，我買野辣水果，食儻完，汝掏佻囡轉去吧！」

珍珍心咧想：「乞我汝剩底的毛，如果汝是我朋友，我一定會送汝汝喜歡的毛！」

珍珍拍開小惠送伊的毛，底勢有野辣蘋果，伊心咧想：「哇，我運氣真好，正好是我最愛食的蘋果！」

珍珍行啊行，行邁市場街，賣鹹餅的老闆手掏蜀其袋袋講：「珍珍啊，汝安無耐幫我去村長辦公室掏鄉公所送的糞埽袋嚕？我忘記掏了。」

珍珍心咧想：「有需要幫忙的辰候乍會想邁我，如果汝是我朋友，我一定會敲自家掏的辰候順便幫汝掏！」

珍珍拍開老闆送伊的袋袋，底勢有蜀包糞埽袋，伊心咧想：「哇，我運氣真好，無需要去村長辦公室就有糞埽袋了！」

珍珍行啊行，行邁自家厝門口，看見隔壁厝阿珠的孫轉厝了。

伊看見珍珍講：「珍珍伊婆，汝手掏的袋袋安是小惠伊姨共鹹餅老闆送的啦？」

珍珍講：「汝怎講會捌？」

阿珠的孫講：「我敲水果店聽著小惠伊姨講伊想買汝愛食的水果，敲鹹餅店，聽邁老闆笑咧講，伊幫汝掏糞埽袋的辰候，忘記掏伊自家的。我野希望有耐像汝蜀樣，有只蠻好的朋友伴我！」